

Sanaartorneq pillugu Inatsisartut inatsisaata allanngortinneqarnera aamma Grønlands tekniske Organisationi pillugu Inatsisartut peqqussutaata allanngortinneqarnera pillugit Inatsisartut inatsisaat (Sanaartukkani piusuni nukimmik sipaarniarluni aaqqissuussinerit kiisalu nuna tamakkerlugu Illuutini Inissianillu Nalunaarsuiffimmik IIN-imik pilersitsinissamut Naalakkersuisunut piginnaatitsisut)

§ 1

Sanaartorneq pillugu Inatsisartut inatsisaanni nr. 13, 26. maj 2010-meersumi tulluuttut
allannguisoqassaaq:

1. § 1 ima oqaasertalerneqassaaq:

“ **§ 1.** Inatsisartut inatsisaata siunertarivaa:

- 1) sanaartukkat ikuallattoornissaq, isumannaallisaaneq peqqinnissarlu eqqarsaatigalugit naammaginnartumik toqqissisimanartunngorlugit sananeqarnissaasa ilusilerneqarnissaasalu qulakkeerneqarnissaa,
- 2) sanaartukkat nunaminertallu sanaartorfiunngitsut sanaartukkanut atasut atuinnissamut siunnerfigineqartoq eqqarsaatigalugu naammaginnartumik pitsaassuseqalernissaasa aammalu illersorsinnaasumik aserfallatsaaliorneqarnissaasa qulakkeerneqarnissaa,
- 3) sanaartukkat innarluutilinnut atoruminartunngorlugit ilusilersorneqartarnerisa siuarsarneqarnissaa,
- 4) sanaartukkat ilusilersorneqarnermikkut pitsaassusiisa siuarsarneqarnissaat,
- 5) iliuissat, sanaartukkani isumalluutini pisariaqanngitsumik atuinnissamut akiuissutaasussat siuarsarneqarnissaat,
- 6) sanaartukkani atortut avatangiisinut ajoqutaanngitsut atorineqartarnerisa siuarsarneqarnissaat, kiisalu
- 7) illuutitut inissianullu tunngasut ataqatigiissumik nalunaarsorneqartarnissaasa aqqutissiuunneqarnissaa qulakkiissallugu.”

2. § 2, imm. 1, ima oqaasertalerneqassaaq:

” Inatsisartut inatsisaat atorineqassaaq:

- 1) nutaamik sanaartornermi, sanaartukkamillu alliliineri,

- 2) inatsimmi aalajangersakkanut imaluunniit inatsit naapertorlugu aalajangersagaliarineqartunut naleqqiullugu sanaartukkami annertuumik allanngortiterinermi allatigullu allannguinermi,
- 3) inatsimmi aalajangersakkanut imaluunniit inatsit naapertorlugu aalajangersagaliarineqartunut naleqqiullugu sanaartukkap atorneqarneranik annertuumik allannguinermi,
- 4) sanaartukkamik ingutserinermi kiisalu
- 5) sanaartukkami nukimmik atuinermit sunniuteqartussaalluni sanaartukkamik piusumik aserfallatsaaliuinermi, allanngortiterinermi allatigullu allannguinermi.”

3. Kapitali 3-p kingorna ilanngunneqassaaq:

”Kapitali 3 a

Illuutini Inissiani Nalunaarsuiffik

§ 17 a. Illuutini Inissiani Nalunaarsuiffik:

- 1) sanaartukkanut tunngasunik, sanaartukkani inissianut tunngasunik kiisalu teknikkikkut atortuutitut il.il. tunngasunik tunngaviusunik paasissutissartaqassaaq,
- 2) illuutit qaqugukkut sanaartorneqarsimanerat apeqqutaatinnagu illuutitut tamanut, matumani inissiat inuussutissarsiorfillu kiisalu teknikkikkut atortuutit uuttuutillu il.il. nalunaarsuiffimmi nalunaarsorneqarsimasut ilanngullugit, ersarissumik nalunaarsuiffeqassaaq atortorissarutit kiisalu
- 3) pisortani oqartussaasunut, inuinnarnut suliffeqarfinnillu paasissutissanik takunnissinnaatitsissaaq.

§ 17 b. Malittarisassat Naalakkersuisunit aalajangersarneqartut malillugit kommunip killeqarfiani Illuutini Inissiani Nalunaarsuiffik kommunalbestyrelsip ingerlatissavaa.

Imm. 2. Illuutini inissiani kiisalu teknikkikkut atortuutitut il.il. nalunaarsuinermi pisariaqartumik ersarissutitsinissaq pitsaassutsikkullu pitsaasuutitsinissaq, piginnittullu nalunaarutigisaannik nakkutiginnissalluni kommunalbestyrelsip qulakkiigassaraa. Illuutini Inissiani Nalunaarsuiffimmi paasissutissat pissutsinut piviusunut naapertuutinningsut kommunalbestyrelsip malugippagu, paasissutissat nutarterneqarnissaat kommunalbestyrelsip isumagissavaa.

Imm. 3. Piginnittut nalunaarsuiffimmut nalunaarutaannik qanoq nakkutilliisoqarnissaannut Naalakkersuisut malittarisassanik aalajangersaassapput.

§ 17 c. Pisortani oqartussaasoq alla imaluunniit ingerlatseqatigiiffik namminersortoq Illuutini Inissiani Nalunaarsuiffimmi tamakkiisumik ilaannakortumilluunniit pilersitsinissaaq, ingerlatsinissaaq ineriartortitsinissaaq illu Inissiani Nalunaarsuiffimmi piginnatissinnaavaat. Oqartussaasoq imaluunniit ingerlatsivik nalunaarsuiffimmi qanoq pilersitsinissaaq, ingerlatsinissaaq ineriartortitsinissaaq illu Inissiani Nalunaarsuiffimmi malittarisassanik aalajangersaassapput.

§ 17 d. Illuutini Inissiani Nalunaarsuiffimmi paasissutissat tulluuttut nalunaarsorneqassapput:

- 1) sanaartukkat ataasiakkaat ilisarnaataat, ukioq sanaartorfusoq, inissisimaffia, angissuseq, ilusaa, atortorissarutit, teknikkimut tunngasut, nukimmik pilersuutit atorneqarneralu, kiisalu
- 2) inissiat imaluunniit inuussutissarsiorfiit ataasiakkaat ilisarnaataat, ukioq sanaartorfusoq, angissuseq, ilusaa, atortorissarutit, nukimmik pilersuutit atorneqarneralu.

Imm. 2. sanaartukkanut tunngasunik, sanaartukkanilu inissianut tunngasunik kiisalu teknikkikkut atortuutitut il.il. paasissutissanik allanik, pisortani oqartussat suliaannut pingaaruteqarsinnaasunik imaluunniit inuiaqatigiinnut allatigut soqutiginaateqartunik nalunaarsuisoqarnissaannik Naalakkersuisut malittarisassanik aalajangersaasinnaapput.

Imm. 3. Nalunaarsuinissami paasissutissat naammattut eqqortullu qulakkeerumallugit Naalakkersuisut kommunalbestyrelsilu paasissutissaasivinni allani paasissutissanik, Illuutunik Inissianillu Nalunaarsuiffimmi paasissutissanut ataqatigiissitsisinnaapput.

§ 17 e. Illuutunik Inissianillu Nalunaarsuiffimmik ingerlatsinermi paasissutissanik atugassanik pisortani oqartussat kiisalu illunik, sanaartukkanik il.il. nalunaarsorneqarsimasunik piginnittuusut paasissutissanik paasissutissiisarnissaannut Naalakkersuisut malittarisassanik aalajangersaassapput.

Imm. 2. Naalagaaffeqatigiinnermi oqartussaasut isumaqatiginninniarfigereernerisigut, illuutit teknikkikkullu atortorissarutit il.il. kalaallit Nunaanni naalagaaffeqatigiinnermi oqartussaasunit atorneqartartut pillugit paasissutissanik nalunaarsuisarnissamik Naalakkersuisut immikkut ittunik malittarisassiorsinnaapput.

§ 17 f. Pisortani oqartussat Illuutunik Inissianillu Nalunaarsuiffimmi takunnissinnaaneritut kiisalu Namminersorlutik Oqartussat ataanni pisortat ingerlatsineritut, kommunillu Illuutunik Inissianillu Nalunaarsuiffimmik atuisussaataaneritut Naalakkersuisut malittarisassanik aalajangersaassapput

Imm. 2. Illuutit, inissiat teknikkikkullu atortorissarutit il.il. pillugit paasissutissanik nalunaarsorneqarsimasunik atuuttunik suliffeqarfiit namminersortut il.il. inuillu takunnissinnaaneritut, matumani paasissutissanik killilimmik takunnissinnaanermut, paasissutissanillu takunnissinnaanermut akiliutissat pillugit Naalakkersuisut malittarisassanik aalajangersaassapput.”

4. § 19-imi imm. 1-ip kingorna immikkoortutut nutaatut ilanngunneqassaaq:

” *Imm. 2.* § 17 b malillugu nalunaarsuinnermut atugassanik paasissutissanik pissarsiniarluni sanaartukkap silataanik takusaanissaq uuttortaanissarlu siunertaralugit, kommunalbestyrelsi eqqartuussivimmi aalajangiinertaqanngitsumik illunukarnissamik piumasaqarsinnaavoq. Paasissutissat piginnittup paasissutissiisutigissallugit pisussaaffigisaanni paasissutissanik annertuumik nikingasoqarneranik pasitsaassaqarnermi, kommunalbestyrelsi illup iluanut alakkaaniarluni uuttortaanianarlunilu eqqartuussivimmi aalajangiinertalimmik illumukarsinnaavoq.”

Taassumap kingorna imm. 2, imm. 3-nngortinneqassaaq.

5. § 20-mi ”§ 19” ”§ 17”-innngortinneqassaaq.

6. § 27-mi imm. 2-mi ”§ 5 imm. 3” ima allannngortinneqassaaq: ”§ 6-imi imm. 3”.

§ 2

Grønlands tekniske Organisationi pillugu Inatsisartut peqqussutaanni nr. 8, 19. december 1986-imeersumi, Inatsisartut peqqussutaatigut nr. 18, 28. oktober 1993-imeersukkut, Inatsisartut peqqussutaatigut nr. 14, 6. november 1997-imeersukkut, Inatsisartut peqqussutaatigut nr. 5, 29. oktober 1999-imeersukkut, Inatsisartut peqqussutaatigut nr. 6, 21. maj 2002-meersukkut, Inatsisartut

peqqussutaatigut nr. 10, 19. november 2007-imeersukkut kiisalu Inatsisartut inatsisaatigut nr. 21, 21. november 2022-meersukkut allanngortinneqartumi, tulluuttut allanngortinneqassapput:

1. § 5 atorunnaarsinneqassaaq.

§ 3

Inatsisartut inatsisaat manna 2023-mi juulip aallaqqaataani atuutilissaaq.

Imm. 2. Kalaallit Nunaanni illunik inissianillu nalunaarsuisarneq pillugu GTO-mit kaajallaasitaq nr. 2.088 12. marts 1987-imeersoq, Sanaartorneq pillugu Inatsisartut inatsisaat naapertorlugu malittarisassatigut aalajangersarneqarluni allanngortinneqarnissaata imaluunniit atorunnaarsinneqarnissaata tungaanut atuutiinnassaaq.

Namminersorlutik Oqartussat ulloq 13. juuni 2023

Múte Bourup Egede (atsior.)

Naalakkersuisut Siulittaasuut

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut